

TE HEHEURAA API

I neia i te piha neneiraa no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farani i te matahiti hoê.

Nu. 11.

Novema, 1920

Mat. 14.

"Aita a te Fatu ra a Iehova e peu i rave, maori râ ia faaite i ta'na parau i moe i tana ra mau tavini i te mau peropheta."

Amosa 3:7.

Aore e parau i faaitehia mai e taiata te taatu i reira; e ao râ to'na o tei haapao i te ture ra.

Maseli 29:18.

PAHONORAA

I te hoê mau parau i faatumuhia i nia i te pene(17)
no te Evanelia a Mareko.

E noa ino ma e, Ia ora na ontou i to tatou farereiraa na roto i teie nei mau parau. I roto i te vea Katolika, no te avae Atopaua pahono rii mai taua vea ra i te hoê mau parau i neineihia a'e nei i roto i te Heheuraa Apî. Te tiaturi nei matou e ua hiopo'a-maite-hia taua na parau e piti ra e ontou. Te na ô maira ratou e, "Teie hoi te parau hopea a te Heheuraa; "E hoa ino ma e, e ere teie i te parau faaino e te parau faahapa tera râ te hinaaro nei matou i te parau mau. *Te imi nei matou i te mau parau mau atoa **.*" E i raro rii mai te na ô maira te pahonoraa e, "Ua mauruuru roa te vea Katolika i teie nei mau parau hopea. Inaha! Aita ratou i faahapa i ta'na ra haapiiraa. Te faaue mai nei ratou i to ratou mau pipi ia imi maite i te mau parau mau atoa. Tapao ïa e: aita e noaa."

E parau mau roa ta ratou e, "Aita e noaa." Ua noaa ê

na râ te mau parau mau e rave rahi. E ere hoi no teie nei te noaaraa, e e ere no te tau i mua nei e noaa'i. Ua noaa ê mai na. Mai te peu e, ua papu i te vea Katorika te auraa mau no te parau, *parau mau*, e ore roa ratou e ru noa i te faahapa mai i te reira. "Te *parau mau* ra, o te ite ia i te mau mea atoa e vai nei, e o te vai na, e o te vai a muri atu." O te Atua ana'e tei ite i te mau parau mau atoa. E mai ta Paulo hoi i faaue mai e, "E hiopoa maite i te mau mea atoa ra; e tei maitai ra e tapea maite," (Tesalonias 5:21,) te na reira atoa nei te Feia Mo'a no te Mau Mahana Hopea Nei au ore noa'tu â te reira i te hoê mau faaroo eê. E hara anei te reira? Aore roa'tu. E no reira te faaue mai nei te mau tavini mau a te Atua i ta ratou ra mau pipi e imi maite i te mau parau mau atoa. E ere hoi ia i te peu a te Feia Mo'a ia faahapa i ta vetahi ê mau haapiiraa. Te paruru mai nei ratou i to te ao, i te mau haapiiraa hape e te afaro ore, o te vare te hoê o to te Atua mau tamarii herehia ra. "Te faaroo nei matou i te Atua Mana hope mai te au i te aau nei, e e faatia'tu hoi ia na reira atoa te taata atoa i te haamori, noa'tu te huru, e te vahi, e te mea ta ratou i binaaro ra." Hiroa Faaroo 11. E no reira ia tuturi noa'tu te hoê mau taata no te hoê mau haapaoraa eê i raro i mua i te idolo, e ia pure noa'tu i te hoê mau peata, e ore matou e haapeapea'tu e aore râ, faahapa'tu. E faa-a'o râ ta matou, E haapii matou i te ravea tia, e ia ore te taata ia faaroo, tirara ia, E aroha atu matou ia'na. Tirara ia parau i reira.

I roto i taua Vea ihora, te nenei mai nei ratou i te hoê mau feruriraa pouri no "Te machine no Haapape." Ua haapii te Heheuraa Api e, "Te vai nei i roto i te Ekalesia ra te Peropheta. Ua riro te Peropheta ei machine parau reva, tei ia'na te ite i te mau *parau api* no ô mai i te Atua ra, e ua riro oia ei faaite i te mau parau mau atoa o tei parauhia mai ia'na."

Te ui mai ra te Vea Katorika e, "Eaha teie mau *parau*

api? Ai
te na ô
tahi par
na i te
XXII:1

Ma
E mai t
rava i r
na ra h
maram
te hoê
huihia
Atua,
okalup
ao poin
râ ia i
evanel
i te pa
e te
roto i
va 18
noa m
na te
teiene
faaho
a te
tou i
tei na
Deute
va ra
nei p
mair
haap

api? Aita ratou i faaite mai. I roto râ i te parau a te Atua, te na ô mai ra Ioane e, : “Ia taati noa mai te hoê taata i te tahi parau ê i teie nei mau parau, na te Atua i taati mai ia’na i te mau pohe i papaihia i roto i teienei puka. Apok. XXII:18.”

Mai te mea ra e, te imi atoa nei ratou i te maramarama. E mai te mea ra hoi, te haapii nei ratou e, e opaniraa teie irava i nia nei i te Atua, eiaha oia ia faaite faahou mai i ta’na ra hinaaro i to’na mau tamarii i raro nei. Te pahono haamaramarama nei matou ia ratou ra e, o te Buka a Moromona te hoê o taua mau parau api ra no ô mai i te Atua ra. Ua rahuihia anei te heheuraa api? Te pahono mai ra te parau a te Atua, *Aita roa ia*. Teihea te irava o te faatia mai e, o te Apokalupo ra o te parau hopea ia ta te Atua e heheu mai i to te ao pouri nei? Aita ia irava i roto i te Papairaa mo’a, tei roto râ ia i te pene herehia e te Katorika, oia hoi te pene 17 no te evanelia a Mareko. Te hape nei ratou no to ratou ite-ore-raa i te parau i papaihia. E taatiraa anei te Buka a Moromona e te mau heheuraa api i te parau i papaihia e Ioane i roto i te Apokalupo? Aore roa’tu. Eaha te auraa o taua irava 18 no te pene 22 o te Apokalupo, tei na ô mai e, “Ia taati noa mai te hoê taata i te tahi parau ê i teienei mau parau, na te Atua i taati mai ia’na i te mau pohe i papaihia i roto i teienei puka.” E opaniraa anei te reira i te heheuraa api? E faahoperaa anei taua irava ra i te papairaa te mau tavini a te Atua i te mau parau api ta’na e faaite mai ia ratou i tera taime e i tera taime? E mau taata pouri ana’e tei na reira i te feruri. E hiopoa tatou i te hoê irava i roto i Deuteronomi i te pene 4 e te irava 2; te na ô mai ra taua irava ra e, “Eiaha outou e taati noa mai i te tahi vahi ê i teie nei parau ta’u e parau atu ia outou, eiaha hoi outou e haamairi i te tahi vahi i taua parau nei.” Na Mose teie parau i haapii atu i to Iseraela i te tau tahito roa ra. Ua riro anei te

reira e opaniraa i te hoê mau buka apî? Aita roa. Ua papai noa râ te mau peropheta e rave rahi i te mau buka e rave rau i muri mai i te tau no Mose. E ere mai te mea ra, te taati ra Isaia i te hoê mau parau ê i ta Mose mau parau, a papai ai oia i te buka i parauhia te buka a Isaia. Oia atoa i te anotau hopea nei, te papai nei te mau peropheta a te Atua i te mau parau i heheuhia mai ia ratou ra. Teie mau ta te Atua i hinaaro i te taata nei, oia hoi, eiaha ratou ia ruri ê i te hoê noa'tu mau parau ta'na e heheu mai i ta'na ra mau tavini i te mau peropheta. E no reira hoi o Mose raua Ioane i faauehia mai e faaaraara i te taata atoa, "eiaha e taati noa mai i te tahi vahi ê i teie nei parau," oia hoi eiaha e faaburu-ê, e aore ra ruri ê, i teie nei parau; eiaha te hoê taata ia taati i te parau ê i ta Ioane iho e ta Mose iho mau parau mai te haavare haere i te taata e, o te parau iho teie ta Ioane iho e ta Mose iho i papai.

"Aita a te Fatu ra a Iehova e peu i rave, maori râ ai faaite i ta'na ra parau i moe i ta'na ra mau tavini i te mau peropheta." Amosa 3:7. O Ioane pîpî here, o te peropheta hopea anei? Aita; no te mea ua haapao o Iesu i te peropheta ia vai noa mai i roto i te Ekalesia. Mai ta Paulo i haapii atu i to Ephesia e, "E ua haapao oia i e tahi pae ei aposetolo; e te tahi pae ei peropheta; * * ei faaau i te feia mo'a i te ohipa ra e orometua, ia tupu i te maitai te tino o te Mesia; ia riro tatou atoa nei ei taata paari, i te faaroo hoê e te ite hoê i te Mesia ra; ia taea te faito ra i te î o te Mesia i te rahi." Ephesia 4:11-14.

Ua oti anei te ohipa a te Peropheta i roto i ta te Atua Ekalesia? Ua taeahia anei "te faito i te î o te Mesia i te rahi?" Aita â ia vahi i taeahia, e no reira te vai noa ra te Peropheta i roto i ta'na basileia ia farii i te "mau parau apî no ô mai i te ra'i ra. Ia ore tatou ia aueue noa i te mata'i ra, i tera parau, i tera parau" tei papaihia i roto i te pene 17 no te buka a Mareko. Na vai i afai roa i te buka i parauhia te

Apokalupo, i te hopea roa o te Bibilia nei. Na te Peropheta a te Atua anei? Na te Atua anei taua ohipa ra? Aita ia. Na te taata teie ohipa i rave. Aita teie buka (Bibilia) i oti i te haaputubia e te neneihia ei buka hoê a papai ai Ioane i te Apokalupo. Na mua ta Ioane papairaa i te episetole e ua na muri roa te haaputuputuraa i te mau episetole e te haaman-
raa ia ratou i roto i te buka hoê. E no reira teie parau i ha-
rubia nei e te mau haapaoraa ei opaniraa i te Heheuraa Apî,
e faaaraararaa ana'e ia i te taata, eiaha ratou ia faahuru-ê, e
ia ruri-ê i te episetole a Ioane i te mau Ekalesia i Asia, e ere
roa ia i te rahuiraa i te heheuraa apî.

“Aore e parau i faaitelia mai e taiata te taata i reira.”
Maseli 29:18. Ia taiata te taata e imi oia i te hoê atua ê. E
no reira eiaha te heheuraa ia opanihia o te hurihia te utua o
teie nei irava i nia ia tatou. A haere mai ra i te Haapape a te
Fatu i te feua nei, ei reira tatou e faaroo ai i te parau api, e
e ore tatou e riro ei feia taiata. Tei reira iho â te e'a e tae atu
ai tatou i te ora man; eiaha râ i te taiata e te “pohe mau.”

Teie â hoi te hoê â parau i neneihia i roto te vea Kato-
rika no te avae Atopa, i te api 1095, i raro a'e i te npoo pa-
rau, “Te tiaî Mamoe.” “O vai ra ta Iesu i faatoroa ei tiaî
mamoe ei faaamu i ta'na mau arenio e i ta'na mau mamoe?
*** O Iotefa Simita anei; te tumu e te faatere rahi o na haa-
paoraa Porotetani, Momoni e te Kanito? Aita. Aita roa te
Bibilia i faaite mai e, ua faatoroa o Iesu ia Iotefa Simita ei
tiaî faaamu no to'na mau mamoe.** A haamaitai tuutuu ore
tatou i te Atua tei faaô mai ia tatou i roto i ta'na nana hoê i
raro a'e ia letu to tatou Fatu, e i raro a'e i te Pope ta Ietu i
faatoroa ei tiaî faaamu na tatou.”

E hoa, e Padrecito iti e, ahiri! a faaite atoa mai oe ia
matou i to oe irava no roto mai i te Bibilia o te haapii mai e,
ua faatoroa Iesu i te Pope ei tiaî faaamu no tatou. Ua nehe-
nehe roa ta oe haapiiraa, e e mea afaro maitai i te taata po-
uri, tera râ, na moe ia oe i te faaite i ta oe tuaroi parau. Te
ite nei râ matou i te reira, oia hoi, Mareko, *Pene 17*.

Ua faatoroa Iesu ia Petero ei tiaï no ta'ua ra Ekalesia i te tau tahito, eiaha râ te Pope. E ua faatoroa o Petero, Iakobo e Ioane ia Iosepha Semita ei tiaï faaamu no ta'ua ra mau mamoe i te tau hopea nei. E mai ia Petero, ua farii atoa taua Peropheta ra no te tau hopea nei, i te mau heheuraa no ô mai i te Atua, e ua faatia oia, na raro a'e i te ururaa o te varua, i te basileia tei parauhia e Daniela i te na ô raa e, "Ia tae i te anotau o taua mau arii ra, e faatupu ai te Atua o te ra'i ra i te hoê basileia, o te ore roa ia e mou, e ore roa hoi e riro ia vetahi ê; e hope roa hoi taua mau basileia ra i te parari e e pau, e vai tera e a muri noa'tu." Daniela 2:44. Eita atoa ia e mou i te faaino e te tuhi.

Oi aramoina ia'u te faaiteraa'tu ia outou i te hoê aamu o te haamaramarama mai ia outou i te huru o te tuaroi parau a to tatou mau hoa, oia te *Pene 17* no te Evanelia a Mareko. A faaroc mai na. Te vai ra te hoê orometua i te fenua papaa o tei itoitō i te haapiiraa i te evanelia i te taata atoa. Ia tae a'era i te hoê po, ua putuputu mai ta'ua ra mau pīpī ia faaroo i ta'ua mau parau. Faaite haamaramarama atura taua orometua i te hoê mau parau ia ratou. E ia hope a'era ta'ua a'oraa, faaite atura oia i te mau pīpī e, "Auanahi vau e haapii ai ia outou i te parau no te ohipa haavare, e te hinaaro nei au ia taio maite outou i te *pene 17* no te evanelia a Mareko." Ia po faahou a'era, putuputu faahou maira te mau pīpī no te haapiiraa. E ia oti a'era te pure e te himene, tia mai ihora te orometua i nia, na ô maira, "Inapo ua faaite atu vau ia outou e, e a'o atu vau ia outou i teienei po no te ohipa haavare e ua ani atu vau ia outou ia taio i te *pene 17* no te parau a Mareko. E i teienei, outou atoa o tei haapa-o e o tei taio i taua *pene* ra, a afai i te rima'atau i nia." Afai ihora na pīpī e hoê hanere i te rima i nia. Ata maira te orometua, na ô maira, "O outou o tei afai i te rima'atau i nia, o outou mau ta'u e a'o atu i teienei po. Ua au roa ia outou te parau no te haavare, no te mea e, aita roa'tu e *pene 17* no te e- vanelia a Mareko."

E au mau hoa here e, "E faaitoito, e ara i te faahopue a te mau Pharisea e te Sadukea."

Papaihia e

Te hoê o te parihia mai e, e hairiti.

Aneterea Sedamana.

Te Hoê mau Haapiiraa Tumu no te Ekalesia a Iesu Mesia
I te Feia Mo'a i te mau Mahana Hopea Nei.

(I tuatihia)

Te Faufaa o te Bapetizoraa.

Ua haere Ioane bapetizo na te medebara i te faaite-hae-re-raa i te bapetizoraa tatarahapa ia matara te hara. Oia atoa i te mahana Penetetote, i to te mau taata faaroora i te parau i a'ohia atu e Petero e te mau aposetolo ra, putapû i-hora to ratou ra mau aau, e ua ui maira ratou ia ratou iho, "E te mau taeae nei, Eaha matou nei?" Ua pahono atura Petero ia ratou, "E tatarahapa, e ia bapetizohia outou atoa i roto i te i'oa o Iesu Mesia ia matara te hara." Ohipa 2:38. Reva noa'tu o Iesu i nia i te ra'i, ua haapii noa'tura o Petero i te bapetizoraa no te matararaa i te hara.

Ia ore te taata ia bapetizohia, e ore roa ta'na mau hara e haamatarahia. Te na ô maira râ te hoê e, "E haapiiraa ê roa te reira ia'u nei, ua haapiihia vau e tapao ana'e te bapetizoraa no te aroha." Aita râ te parau a te Atua e faatia i te reira. Ia bapetizohia tatou e tia'i, ia horoi-ê-hia atu to tatou mau hara. E faaineineraa te reira ia tatou ia farii tatou i taua aroha ra i roto i to tatou mau aau. Te parau mai nei râ to te ore e farii i taua parau nei e, te haapii maira Petero e, e ere te bapetitoraa i te horoi-ê-raa atu i te viivii o te tino, i te haapaoraa râ i te ture a te Atua ra. E parau mau ho'i te reira. Aore roa Anania i faaue atu ia Paulo ia bapetizohia ia horoi-ê-atu i te mea viivii o te tino nei, ia bapetizohia râ no te horoi-ê-raa i ta'na mau hara.

Aita te parau i papaihia e faatia i te bapetizoraa i te mau aiû. E aita hoi te reira i au ia feruri. Aore a te aiû e hara; "Mai ia ratou hoi to te basileia o te Atua ra." E parau mau e, ua tae mai te hara a Adama i nia iho i te taata nei, ua rave râ o Iesu i te hopoia o tana hara ra i nia iho ia'na, e ua pohe oia i nia i te satauro ei taraehara no to te ao nei. "A hio na i te Arenio a te Atua o tei hopoiê atu i te hara o to te ao nei." Ioane 1:29. Te haapui maira te Bibilia e, te bapetizohia nei te taata ia matara ta'na iho mau hara, eiaha te hara a vetahi ê; e e faautuahia oia no te mau hara ta'na iho i rave, eiaha râ no te hara a Adamu, ua matara roa tatou i te reira hara na roto i te taraehara o te Mesia.

Ua papai atura Paulo i te episetole i to Ephesia e, "Hoê hoi Fatu, hoê faaroo, hoê bapetizoraa". Eph. 4:5. E ua haamaramarama atoa mai oia i te huru o te raveraa i tana orora; "Ua tanuhia tatou e oia atoa, i te bapetizoraahia i roto i to'na ra pohe; mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora apî. I apiti-atoa-hia hoi tatou ia'na i te huru o to'na ra pohe; e apiti-atoa-hia ia tatou i te huru o to'na ra tia-faahouraa i nia."

Mai ta te Mesia tanuraahia i te pape i Ioridana, "te haerea mai oia i nia mai raro mai i te pape maira", mai te reira atoa te bapetizoraa o te feia mo'a, "I tanu-atoa-hia outou e oia atoa i te bapetizoraa, "te farii nei ratou i te bapetizoraa utuhiraa i roto i te pape mai te au i te ture i faatiahia e Iesu. Ua bapetizo ihora Ioane "i Aino i pihaiho i Salima, no te mea e rave rahi to reira pape."

Ua titau Iesu i te bapetizoraa "ia faatia i te mau parautia e au ai." Ia oti to'na bapetizoraahia i te pape, (faauraa i te pape), e ia haere mai oia i nia mai raro mai i te pape, pou mai ihora te Varua Maitai i nia iho ia'na, e ua faaroohia a'era te hoê reo i te na ô raa e, "Tau Tamaiti here teie, ua mauruuru roa vau ia'na." Tera ia te taipe no te bapetizoraa. Ua na reira atoa te feia tatarahapa i te bapetizoraahia e te

hoê tavini i haamanahia e te Atua, e tuuhia ia feia i raro i te pape, e e haere mai ratou i nia mai raro mai i te pape. Ua tanuhia e ua faatia-faahou-hia i nia. E no reira ua fanau faahou ratou i te pape i te fariiraa i te bapetizoraa i faatiahia e te Fatu. Ia oti ta te taata fanau-faahouraa i te pape, e ia haamatarahia ta'na mau hara e te Metua, ua au ia'na i reira ia farii i te Varua Maitai tei ore roa e parahi i roto i te hiero viivii.

Na roto i te tuuraa rima e horoahia'i te Varua Maitai i te feia i bapetizohia. E mana ta te taata ia bapetizo e tia'i. Te haapii maira te Bibilia e, ia ravehia te bapetizoraa e te feia i haamanahia e te Atua e tia'i. "E aore roa e taata e rave noa i teie tura no'na iho, maori râ o tei parauhia e te Atua, mai ia Aarona ra." "Hebera 5:4. Ua nafea ta Aarona parauraahia? Ua maitihia oia e te Atua e ua faatoroahia oia i raro a'e i te rima o Mose. A hio i te Exodo.

Ua faaue te Atua i ta'na ra mau tavini i te mau apose-tolo, "E haere outou e faairi i to te mau fenua atoa ei pîpî, a bapetizo atu ai ia ratou i roto i te i'oa o te Metua, e no te Tamaiti e no te Varua Maitai." Ua na mua râ to Iesu maitiraa e ta'na faatoroaraa e ta'na haamanaraa ia ratou, e i reira to'na tonoraa ia ratou na te mau fenua atoa. "Ua faataa atura oia i te tino ahuru e ma piti, ei pihaiho ratou ia'na, e ua tono hoi oia ia ratou e poro haere i te basileia." Mareko 3:14. E o teie tura i horoahia e Iesu ia ratou, o to ratou ia mana, te mana no te autahu'araa mo'a. Ua haapapu Iesu ia ratou i taua vahi ra, i te na ô raa e, "E ere o outou tei hinaaro mai ia'u, o vau râ tei hinaaro atu ia outou, e ua haapao ia outou ia haere outou e hotu i te huero, ei huero vaiiho taiata, ia horoa mai te Metua ia outou i ta outou e ani atu ma to'u nei i'oa ia'na ra." Ioane 15:16. Ahiri ratou i haere noa mai to ratou iho mana, mai te haamana-ore-hia e te Atua, e ore roa'tu te Atua e farii i te ohipa i ravehia i to ratou ra rima.

Ua tiavaru Paulo i te mau varua ino i rapae au i te taata na roto i te mana o te Atua i vai noa ia'na, e ua tamata ihora na tamarii toohitu o Sekeva ia na reira atoa, e no to ratou mana ore, ua manuia ore roa ratou. A tomo maori outou na te uputa pirihaui tae atu ai i te ora mau, "Eiaha roa te hoê taata ia rave noa i teie tura no'na iho, maori râ o tei paraubia e te Atua, mai ia Aarona ra."

Ua papu roa ia tatou atoa e, ia baptizohia te taata atoa e tia'i ia noaa ia ratou te ora mure ore, no te mea e, "Ia ore te taata ia fanau faahou (i te pape e te varua) e ore roa oia e ô i roto i te Basileia o te Atua." E reira e horoahia mai ai te Varua Maitai.

I muri iho i te tifaahouraa o te Fatu ua fâ mai oia i ta'na ra mau Aposetolo, ua faaue oia ia ratou eiaha e faarue i te oire Ierusalema, "E tia'i râ i ta te Metua i parau maira, o ta outou i ite na ia'u ra. Ua baptizo â hoi Ioane i te pape, e baptizohia râ outou i te Varua Maitai eie i nei pue mahana. Ohipa 1:4-5."

E i te mahana Penetetote, ua tairuru ihora te mau Aposetolo, "E aore e mahia, o te haruru maira no nia mai i te ra'i mai te maitai rahi u'ana ra, i roa a'era te fare i parahi-hia e ratou ra, e i a'era ratou i te Varua Maitai, ua parau ihora i te parau êê, i ta te Varua i horoa mai i te parau ia ratou ra." E i taua mahana ihora ua tatarahapa te mau taata e rave rahi, e ua baptizohia ratou e te mau Aposetolo, e ua farii a'era ratou i taua Varua Maitai ra.

"E ite a'era te mau Aposetolo e parahi i Ierusalema ra e, ua mau to Samaria i te parau a te Atua, ua tono atura ratou ia Petero raua o Ioane ia ratou ra. E tae atura raua i raro, ua pure ihora ia horoahia mai te Varua Maitai ia ratou ra." Ohipa 8:14-16.

No reira e homa, outou atoa o te taio mai i teie nei mau parau rii, a hiopoa maite i te mau vahi atoa e tapea maite i te mau haapiiraa o tei au i te parau i papaihia ra. Ia na re-


ira tatou i te hiopoaraa i te mau parau atoa e tia'i; e ia itea te parau mau o ta outou ia e haapao. E ia na reira tatou e noaa ia tatou te hoê parahiraa hanahana i roto i te Fare o te Metua ra.

Papaihia e
Iese Hesalopa.



Mau Parau Apî

Te faaite maira te hoê rata no te Peresideniraa mata-mua o te Ekalesia e, ua maitihia a'e nei toopiti orometua apî ia tonohia mai i teie mau fenua rii o te moana nei. Teie to raua na i'oa; oia hoi, o Maratini e o Alabera. E tae mai raua na nia i te pahi vea ra, o Marama i te mau mahana hopea no te avae Novema nei. E parau faahiahia rahi teie no te mea e, e orometua ite roa Maratini i te ohipa faatairaa harmonia, e e riro teie ohipa i te faaitoito-faahou-hia i te mau avae i mua nei. No te tufaa fenua Idaho mai o Alabera, o Maratini râ, no Utaha mai ia. Te haamana'o nei matou i te parau a te Fatu i ta'na ra Peropheta i te anotau hopea nei, oia, "A tono i te mau peretibut-ro no ta'u ekalesia i te mau nunaa i te atea ê ra; i te mau fenua rii no te moana ra; a tono atu i te mau fenua eê ra; a tiaoro atu i te mau fenua atoa ra; i te Etene na e i muri a'e i nia i te ati Iuda. E inaha, a hio na, o teie hoi ta ratou e pii, e te reo a te Fatu i te taata atoa. A haere atu outou i te fenua Tiona, ia faarahihia te mau otia a to'u ra mau taata, e ia faaetaetahia to'na ra mau titi, e ia taeahia atu e Tiona te mau fenua i fatata mai nei; oia ia a faatae i te pii i te taata atoa. A ara e a tia a haere a faafarerei atu i te tane faaipoipo apî. E inaha, a hio na, te haere mai nei te tane faaipoipo apî, a haere outou a farerei atu ia'na. *A faaineine outou iho i te mahana rahi o te Fatu.*" B. F. S. 108:3.



Ua haamanahia a'e nei i te fenua ra America te hoê ture maitai apî. E taua ture ra, no te mau vahine ia. Na roto i taua ture ra e noaa'i i te vahine te tiaraa ia maiti i te mau maitiraa atoa. I te mau tenetere i mahemo a'e nei, aore taua huru tura i noaa i te mau vahine o te ao nei. I teie nei râ, na roto i te itoitoe o te mau vahine no Marite, ua haamanahia taua ture ra, e ua riro te vahine ei faito i te tane i te ohipa maitiraa. Te mauruuru nei te mau Feia Mo'a i taua ture apî nei, no te mea e, mai te mahana i faatiahia te Ekalesia a Iesu Mesia i te Feia Mo'a i te mau Mahana Hopea nei e i teie nei â, ua faafaitohia te tane e te vahine i roto i taua huru ohipa ra. Tei raro nei taua ture ra:-

“Irava-, tufaa hoê. Te tiaraa o te mau huiraaatira o te hau Marite ia maiti, aore ia e faaerehia aore hoi e haapeapea hia e te hau Amerita e aore ra te hoê tufaa fenua, no te huru vahine e te huru tane.

“Tufaa 2. Ei mana ta te Piha Iriti Ture, na roto i te mau ture e au, ia haamana i tei faaitohia i roto i taua irava ra.”

I te mahana i haamanahia'i taua ture ra, ua faahanahana roa te mau vahine i te reira na roto i te mau arearearaa maitai e te mau putuputuraa.

Radio i te 5 no Novema. Ua riro te rê no te maitiraa Peresideni i te taata ra o Harding. No te pupu maitiraa oia, i parauhia Repubelica. O oia te Peresideni apî no te Hau America. E mana noa o Wilson, (te peresideni tahito), e tae noa atu i te 4 no te avae Mati i te matahiti 1921 i mua nei, ei reira o Harding e haamana-roa-hia'i ei Peresideni. E maha matahiti te maoro o te manaraa o te hoê Peresideni i te Hau America. Ua parauhia e, e 5,000,000 titeti maitiraa ta Harding o te hau i nia a'e ia i ta Cox (Democrat) mau titeti.

L. H. KENNARD Jr. Imprimeur, Rue Brea et de la
Rue Dumont d'Urville, Orovini, Papeete. Tahiti
